

Hiburan dalam Islam

06 Jamadilakhir 1444H/30 Disember 2022

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita meningkatkan ketakwaan kepada Allah Subhanahu wa Ta'ala dengan mengerjakan suruhan-Nya dan meninggalkan larangan-Nya. Mudah-mudahan kita mendapat keredhaan Allah Subhanahu wa Ta'ala di dunia dan akhirat.

Sidang Jumaat yang dirahmati Allah Subhanahu wa Ta'ala,

Fitrah manusia perlukan hiburan dalam kehidupan. Hiburan ialah sesuatu yang boleh mengembirakan hati, merehatkan minda, menyenangkan jiwa dan menyedapkan pendengaran. Islam tidak menyekat umatnya mencari hiburan selagi mana tidak keluar daripada batas syarak. Hiburan adalah sebahagian nikmat dunia yang harus

dimanfaatkan oleh orang beriman dengan cara yang betul.
Firman Allah Subhanahu wa Ta'ala dalam surah al-A'raaf ayat 32 :

أَعُوذُ بِاللَّهِ مِنَ الشَّيْطَانِ الرَّجِيمِ

قُلْ مَنْ حَرَّمَ زِينَةَ اللَّهِ الَّتِي أَخْرَجَ لِعِبَادِهِ، وَالطَّيِّبَاتِ مِنَ الرِّزْقِ قُلْ هِيَ
لِلَّذِينَ آمَنُوا فِي الْحَيَاةِ الدُّنْيَا خَالِصَةً يَوْمَ الْقِيَامَةِ قُلْ كَذَلِكَ نُنْصِلُ
الْآيَاتِ لِقَوْمٍ يَعْلَمُونَ ﴿٣٢﴾

Yang bermaksud: *Katakanlah (wahai Muhammad): "Siapakah yang (berani) mengharamkan perhiasan Allah yang telah dikeluarkan-Nya untuk hamba-hamba-Nya, dan demikian juga benda-benda yang baik lagi halal dari rezeki yang dikurniakan-Nya?" Katakanlah: "Semuanya itu ialah (nikmat-nikmat) untuk orang yang beriman (dan juga yang tidak beriman) dalam kehidupan dunia; (nikmat-nikmat itu pula) hanya tertentu (bagi orang yang beriman sahaja) pada hari kiamat".*

Rasulullah Sallallahu Alaihi Wasallam sendiri memahami kecenderungan manusia kepada hiburan. Ketika Saidatina Aisyah membantu seorang perempuan Ansar untuk persediaan majlis perkahwinannya, Rasulullah Sallallahu Alaihi Wasallam bersabda dalam hadis Riwayat Imam al-Bukhari:

يَا عَائِشَةُ مَا كَانَ مَعَكُمْ هُوَ فَإِنَّ الْأَنْصَارَ يُعْجِبُهُمُ اللَّهُ

Yang bermaksud: *“Wahai ‘Aisyah, tidak adakah sebarang hiburan dalam majlis perkahwinan ini? Sesungguhnya kaum Ansar amat menyukai hiburan.*

Diriwayatkan juga bahawa Sayyidina Umar RA pernah mendengar seorang lelaki menyanyi di padang pasir, lalu beliau berkata, yang bermaksud, nyanyian itu merupakan bekalan bagi seorang pengembara.

Masih banyak kisah yang berlaku pada zaman Rasulullah Sallallahu Alaihi Wasallam dan zaman para sahabat yang menunjukkan kepada kita bahawa Islam sama sekali tidak melarang untuk berhibur.

Sidang Jumaat yang dirahmati Allah Subhanahu wa Ta’ala,

Apa yang menyedihkan kita pada hari ini ialah hiburan telah membawa kepada kerosakan terhadap umat Islam. Mengapa ini berlaku? Mari kita memahami fatwa yang dikeluarkan oleh Jabatan Mufti Mesir,

“Mendengar muzik dan nyanyian serta menghadiri konsert adalah harus jika lagu-lagu yang dimainkan berunsur keagamaan dan menyeru kepada patriotisme dan semangat kenegaraan, atau yang menzahirkan kegembiraan sempena perayaan dalam keadaan mengelakkan percampuran bebas lelaki dan perempuan. Selain itu, nyanyian itu sendiri bebas daripada unsur keji, dosa dan perkara yang diharamkan seperti arak dan kelucahan, tidak

menimbulkan nasfu syahwat serta tidak melalaikan daripada perkara-perkara yang wajib.”

Pada hakikatnya bukanlah hiburan itu yang dilarang, yang dilarang ialah senikata lagu yang tidak baik, berlakunya pergaulan bebas semasa berhibur, mendedah aurat dan lain-lain maksiat. Tambah menyedihkan lagi apabila hiburan itu menyebabkan kita meninggalkan solat dan melakukan maksiat.

Sidang Jumaat yang dirahmati Allah Subhanahu wa Ta'ala,

Penganjuran konsert secara melampau seperti sambutan hari Halloween tidak patut dilakukan. Sambutan tahun baru 2023 akan datang ini hendaklah kita menjauhi sekiranya pengisian sambutan itu boleh mengundang kemurkaan Allah Subhanahu wa Ta'ala.

Janganlah kita meniru budaya songsang dari luar negara yang boleh merosakkan akidah, akhlak dan peradaban kita sebagai orang Islam. Benarlah sabda Rasulullah Sallallahu Alaihi Wasallam dalam hadis yang diriwayatkan oleh Imam Muslim:

Yang bermaksud: *“Kamu akan mengikut jejak langkah umat-umat sebelum kamu, sejengkal demi sejengkal, sehasta demi sehasta, sehingga jikalau mereka masuk ke lubang biawak pun kamu akan mengikuti mereka”. Sahabat bertanya: “Wahai Rasulullah, apakah Yahudi dan Nasrani yang engkau maksudkan?” Nabi Rasulullah Sallallahu Alaihi Wasallam menjawab: “Siapa lagi kalau bukan mereka?”*

Marilah kita semua mengubah cara hidup masyarakat Islam di negara ini kita dengan mengikut sunnah Rasulullah Sallallahu Alaihi Wasallam dengan cara yang paling asas iaitu solat berjemaah di masjid. Alangkah indahnya apabila anak muda memenuhi masjid terutamanya pada waktu maghrib, isyak dan subuh serta mereka menerima pengisian ilmiah. Untuk menjayakannya hendaklah setiap kepimpinan berjemaah bersama dengan orang di bawah pimpinannya. Beginilah qudwah yang ditarbiahkan oleh Rasulullah Sallallahu Alaihi Wasallam, maka lahirlah sahabat seperti Sayyidina Abu Bakar Radhiallahu anhu, Sayyidina Umar Radhiallahu anhu dan lain-lain.

أَعُوذُ بِاللَّهِ مِنَ الشَّيْطَانِ الرَّجِيمِ

وَلَوْ أَنَّ أَهْلَ الْقُرَىٰ آمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ
وَالْأَرْضِ وَلَكِن كَذَّبُوا فَأَخَذْنَاهُم بِمَا كَانُوا يَكْسِبُونَ

Yang bermaksud: “Dan (Allah berfirman lagi), “Sekiranya penduduk negeri itu beriman serta bertakwa, pastilah Kami akan membuka (Pintu pengurniaan) untuk mereka yang melimpah ruah keberkatannya dari langit dan bumi. Tetapi, mereka mendustakan (Rasul Kami) lalu Kami timpakan mereka dengan azab seksa disebabkan perbuatan mereka.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا

وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ
وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.